

1 TSIMOOT

Pooj já Tsimoot hã Paw-Ro ma erih do hahỹỹh

1 ¹⁻² Ỹ Paw-Ro, Kristo Jesus mejũũ do seeh, ỹ edeng õm Tsimoot, hẽp ỹ n'aa Jesus hã mah'yy ka'eeh do hyb n'aa tah ỹ hado däk doo. Kristo mejũũ do see ỹ wén hado däk, P'op Hagä Doo, ër h'yyb tym dëeb, Kristo Jesus, ta hã ër h'yy kasadä do ỹ ramejũũ do hyb n'aa.

Ỹ karën P'op Hagä Do ër Yb, Kristo Jesus ër Wahë N'aa na-ãäj hẽ ky en'yym a hã. Ỹ karën õm rat'yypd mehĩn, baad õm rah'yyp n'yym.

Ma matëg oow ky n'aa hahỹỹh

³ Masedonija häd näng do häj n'aa hënh ỹ bahõm noo gó tak'ëp ỹ betsëe doo da a hã Epeso häd näng do panang bä mabaym hyb n'aa, tii da p'aa hënh ỹ betsëe a hã, t'ĩĩ hënh mabaym hyb n'aa, mameduuk hyb n'aa ajyy ta see hadoo Jesus ky n'aa ma met'ëek doo. ⁴ Maher'ood sa hã raberéd hõm hyb n'aa panyyg heh'äat ub nadoo doo, noo kanesa doo. Maher'ood sa hã na-ãäj hẽ, sa wahë makũ sa häd ketsén do nahänh do raberéd hõm hyb n'aa. Ky kedak do du n'aa do tii. Dooh tamasaa bä P'op Hagä Do karën do hã. Jääm né hẽ P'op Hagä Do hã ji h'yy kae bä, takarën do ji bahapäh. ⁵ Tii da ỹ karën mamejũũ sa hã, sahõnh hẽ Jesus hã h'yy ka'eeh do t'ĩĩ hënh habong do rakamahãn hyb n'aa sa da hadoo doo. Ỹ karën sa da hadoo do rakamahãn, baad hado däk do hyb n'aa sa h'yyb tym, t'õp madäk doo me rah'yy ka'eeh do hyb n'aa na-ãäj hẽ. ⁶ Dooh tii da raboo boo bä nanäng ma matëg oow, daap hadoo do rawén her'ood kãn. ⁷ Mosees ky n'aa jaw'yyp do ma mehetëk do rakarën rabahado paawä, sa daaj hẽ na-ãäj hẽ dooh rah'yyp mepëe bä rahe'oot do hã. Baad rabahapäh ji ed'oo rahe'oot doo. Ti hado né hẽ paawä, dooh rah'yyp mepëe bä rahe'oot do hã.

⁸ Baad ub né hẽ Mosees ky n'aa jaw'yyp do ër hapäh, baad ub, P'op Hagä Do karën doo da ji mahũũm bä ti ji h'yyb tym gó.

⁹ Dooh P'op Hagä Do an'oo bä ta ky n'aa jaw'yyp do takarën doo da habong do sa hyb n'aa. P'op Hagä Do anoo ta ky n'aa jaw'yyp do hahỹ sa hyb n'aa: Ky n'aa jaw'yyp do ky nadah'eeh do sa hyb n'aa, ta hã h'yy kawereem do sa hyb n'aa, P'op Hagä Do hã h'yy

kana'eeh do sa hyb n'aa, nesaa do moo bok do sa hyb n'aa, P'op Hagä Do waneh'ëeh do sa hyb n'aa, P'op Hagä Do raky n'aa rejää do sa hyb n'aa, sa yb sa yÿn ta wób na-ääj hë dahej'ëep do sa hyb n'aa, ¹⁰sa yÿm, sa patug nadoo do sii he'yÿh do sa hyb n'aa, ajyy ajyy sii he'yÿh do sa hyb n'aa, ta wób ramesoo rabesëem h'üüm do hyb n'aa sa hyb n'aa, daap men'yyh do sa hyb n'aa, P'op Hagä Do häd gó daap raky kajäk do sa hyb n'aa. P'op Hagä Do banoo ta ky n'aa jaw'yyk doo, baad hadoo do ky n'aa hä baad kanejäk do hyb n'aa na-ääj hë. ¹¹Baad hadoo do ky n'aa y hanäng doo, baad tabadäng P'op Hagä Do ky n'aa hanäm do hä. Ti né hë ta T'aah ky n'aa hanäm do P'op Hagä Do anoo hä yÿ, y metëek hyb n'aa ta wób sa hä. P'op Hagä Doo, baad had'op doo, ër weh'ëeh do ky n'aa né tii.

Paw-Ro P'op Hagä Do t'yyd mehïin do ky n'aa hahÿÿh

¹²Y tsebé Kristo Jesus ër wahë n'aa wë, y tah'yyb hejoonh doo. Ta hä pé baad had'yyt hë y moo wät y tamejüü doo, ti hyb n'aa hä y tah'yyb däng ta ky n'aa y baher'ood hóm hyb n'aa. ¹³P'ooj ub ta hä y ky n'aa rejä né paawä, ta karapee y no n'aa maso né paawä, y rejä né paawä sa hä, Jesus Kristo y tat'yyd mehïin, dooh ta hä y h'yy kae nä bä do hyb n'aa, dooh y h'yy ganyy nä bä P'op Hagä Do t'aah tado bä do hyb n'aa. ¹⁴Tak'ëp né hë ër Wahë N'aa ky enyym hä yÿ, nes'aa né paawä yÿ. Hä y tabanoo baad y h'yy ka'eeh hyb n'aa ta hä. Hä y tabanoo na-ääj hë, baad ta wób y kamahän hyb n'aa. Séd hä ji h'yy kata däg bä Kristo Jesus hä, tii d' né hë tabanoo ji hä.

¹⁵Te hub né hë hahÿÿh, taw'ääts hë ji ky daheeh: Kristo Jesus ewäd hyng ër mahang, nesaa do moo bok do tabed'ëep hyb n'aa nesaa do mahänh. Ta ti nesaa do moo heb'ook do sa bahänh baad nadoo do paa yÿh. ¹⁶Ti hadoo né hë, y tat'yyd mehïin, y sa bahänh nesaa do moo wät do paah. Y tawén t'yyd mehïin, ta wób rahegää bä, rahapäh hyb n'aa dooh Jesus Kristo ty n'aa gesyng bä ji. Baad ub Kristo. Hä y tabad'oo do hä rabahapäh hÿÿ kä, dooh h'yy kejÿÿk pé ta hä. Y tat'yyd mehïin bä, ta wób ta hä h'yy ka'eeh do na-ääj da tat'yyd mehïin, edëb had'yyt do ta pa ragadoo hyb n'aa.

¹⁷P'op Hagä Do né hë sahönh hë bag'ääs doo. Ti né hë hawäd had'yyt doo, nadajëp doo, ji nahapäh doo. Sé ub né tii. Dooh ta see péh. Taw'ääts hë ji wehëe had'yyt hë. Taw'ääts hë ta hä ji j'aa etsëe had'yyt hë. Yÿ. Tii d' né hë. Taw'ääts hë.

18-19 Tsimoot, tah ŷ hadoo doo, òm ŷ mejũũ hahŷŷh, baad mamoo wäd, baad mama met'ëëg, baad awäd, baad mameduug ta s'ee hënh ma metëëk do na-ããj hë. Taw'ããts hë Jesus hã mah'yy kae had'yyt hë. Baad awäd, a h'yyb tym òm taky n'aa natapaa hyb n'aa. Òm ŷ mejũũ do baad tanu kejäk P'op Hagä Do kyyh hã p'ooj ub a hã ta rod n'aa rahe'oot doo. Ta wób dooh raky dahé bã sa h'yyb tym sa hã metëëk doo. Ti hyb n'aa gawatsig jëng Jesus hã rah'yy ka'eeh do paah. 20Ti hedoo do mahang ti abong ajyy Imenëw Aresän häd enäh doo. ŷ ah'eed h'ũũm, Jesus hã h'yy ka'eeh do mahang ranabok hyb n'aa. Nesaa Do Yb moo gó ŷ bahaëëj däk. Tii d' ŷ wén d'oo sa hã, rabahapäh hyb n'aa, dooh P'op Hagä Do ji ky n'aa rejã bã.

P'op Hagä Do hã ji ky n'aa etsëë do ky n'aa hahŷŷh

2 Pooj jé tak'ëp péj ŷ betseë a hã, P'op Hagä Do hã ji ky n'aa etsëë, P'op Hagä Do sii ji ber'oot hyb n'aa sahõnh hë sa hyb n'aa. Taw'ããts hë na-ããj hë P'op Hagä Do ji j'aa etsë sahõnh hë sa hyb n'aa. 2Taw'ããts hë ji häj n'aa wahë n'aa ji ky n'aa etsëë P'op Hagä Do hã. Ta wób wahë n'aa hedoo do ji ky n'aa etsëë né tii d' ënh. Taw'ããts hë ji ky n'aa etsëë né tii, baad ub, h'yyb nyw gó, P'op Hagä Do karën doo da, tsyt hë ta wë ër bahajaa ër babok hyb n'aa. 3P'op Hagä Do ji h'yyb tym dëëb gen'aak ta hã ji ky n'aa etsëë doo. Baad ti ta hã. 4Takarën sahõnh hë badäk hahŷŷ hã habong do tabed'ëëp nesaa do mahãnh. Takarën baad hadoo do ky n'aa rabahapäh hyb n'aa. 5Jããm né hë sét hë P'op Hagä Doo. Jããm né hë sét hë sahõnh hë badäk hahŷŷ hã habong do rod n'aa P'op Hagä Do wë, P'op Hagä Do wë ji mahũũm doo. Kristo Jesus, aj'yy gó kesok do né hë tii. 6Ta daaj hë ti takan'oo däk dajëb hã, sahõnh hë badäk hahŷŷ hã habong do tabed'ëëp hyb n'aa. Ta daaj hë takan'oo däk dajëb hã ër ted'ëëp do sãm. Ti né hë ta T'aah ky n'aa, tah'yyb däng noo gó badäk hahŷŷ hã habong do sa hã P'op Hagä Do metëëh doo. 7Ta ti ky n'aa ŷ baher'oot hyb n'aa ŷ P'op Hagä Do wén sëëw hõm, ta ky n'aa rod, ta mejũũ do ŷ bahadoo hyb n'aa, Judah buuj nadoo do sa hã ŷ ma metëëk hyb n'aa Jesus hã rah'yy ka'eeh hyb n'aa kã. ŷ tasëëw hõm panyyg baad hadoo do ŷ ma metëëk hyb n'aa sa hã. Dooh daap ŷ menä bã. Né hup ŷ né hë tii.

8Ti hyb n'aa ŷ karën jé pad'yyt hë rakahet'aa bã P'op Hagä Do rahyb n'aa jew'yyk hyb n'aa, baad ub ajyy raky n'aa etsëë. P'op Hagä Do wë sa moo ragadabëëh bã p'op raky n'aa etsëë bã, taw'ããts hë baad ub sa h'yyb tym P'op Hagä Do matym gó. Taw'ããts hë ky n'aa

ets'ēē doo, dooh rakawaj'āān bā ta wób sa wē, dooh raky kedag bā ta wób sa hā. ⁹Rakahet'aa bā P'op Hagā Do rahyb n'aa jew'y'yk hyb n'aa, ȳ karēn ȳȳj dooh rakametā bā sa saroor hyb n'aa. Taw'āāts hē dooh rapadedāg bā nu meby n'aa nāng doo. Taw'āāts hē taw'āāts hadoo do rapadedēēk. Taw'āāts hē dooh rakametā bā ta see mo n'aa hado dāk do sa sēēn ramahetsooh doo me. Taw'āāts hē dooh rakametā bā k'āāts tēg gabarēēh do s'ēēb me, perora hād nāng doo me, saroor tak'ēp ky n'aa gebah doo me na-āāj hē.^a ¹⁰Taw'āāts hē ȳȳj P'op Hagā Do hā raky daheeh rahanāng do ta wób ramasa. Ti né sa hetsó sa hā. ¹¹Taw'āāts hē bag hēnh, rakanasab'ee doo gó rama kametēēk P'op Hagā Do ky n'aa. ¹²Dooh ȳ an'oo bā ȳȳj rama met'ēēg bā ajyy. Dooh ȳ an'oo bā ȳȳj ramejō bā ajyy. Bag hēnh ȳ karēn ȳȳj rabab'ēēh, ramaa newēē, Jesus hā h'y'y ka'eeh do rakahet'aa bā. ¹³Tii d' ȳ wén edoo, pooj jé P'op Hagā Do pahuuj wāt Adāw, ta jawén Ewa. ¹⁴Dooh aj'y'y tado bā Nesaa Do Yb wadii doo. Ewa né paa ti tawadii. Ewa né paa P'op Hagā Do mejūū do ky nadaheeh doo. ¹⁵Ti hadoo né hē rahet'aah do hyb n'aa P'op Hagā Do ed'ēēp da nesaa do mahānh, Kristo hā rah'y'y kae had'y'yt bā, ta wób rakamahān had'y'yt bā, rakanasabé bā, P'op Hagā Do karēn doo da rabok bā.

Jesus hā h'y'y ka'eeh do sa wahē n'aa ji asēēw hōm do ky n'aa hahȳȳh

3 Te hub né hē hahȳȳh: Jé karēn pé ta h'y'yb gó Jesus hā h'y'y ka'eeh do sa wahē n'aa, sa hagā n'aa tabahadoo hyb n'aa, baad ub né tii. ²Ti hyb n'aa, taw'āāts hē baad ub tabawāt Jesus hā h'y'y ka'eeh do sa hagā n'aa tabahadoo karēn doo. Taw'āāts hē dooh baad nadoo do rahapāh pé ta hā. Taw'āāts hē sét ub ta ȳym. Taw'āāts hē dooh ta ȳym tawad'ii bā ȳynh see sii. Taw'āāts hē kaja hē denaa hē ta h'y'yb tamahūūm. Taw'āāts hē tah'y'y keb'aah nesaa do hā. Taw'āāts hē ta wób hā baad ta h'y'yb, ta hā raweh'ēēh hyb n'aa. Taw'āāts hē baad tagadoo ta wób ta tób yt hā. Taw'āāts hē tahajaa ta wób tama metēēk P'op Hagā Do panyyg hā. ³Taw'āāts hē dooh jarakē hedoo do heēēk do tado bā. Taw'āāts hē da dooh kahep'uuk do tado bā. Taw'āāts hē ta wób baad taky n'aa en'yym, dooh tamebaaj bā. Taw'āāts hē dooh dajēēr tahyb n'aa hūūm bā. ⁴Taw'āāts hē baad tah'y'yb mahūūm ta panaa. Taw'āāts hē ta taah tametēēk raky daheeh hyb n'aa sa yb, baad raweh'ēēh hyb n'aa sa yb.

^a **2.9** Tii da Paw-Ro wén mejūū, ȳȳj wē ta wób raty gapanad'ēēk hyb n'aa, ta s'ee hēnh sa h'y'yb nawāt hyb n'aa.

⁵Ta panaa baad h'yyb manahũũm doo, dooh tahaja bã Jesus hã h'yy ka'eeh do tah'yyb mahũũm bã. ⁶Doooh taw'ããts hẽ tado bã papuuuj Jesus hã h'yy kae dãk do sa wahẽ n'aa. Papuuuj Jesus hã h'yy kae dãk do tado bã paawã, nepãh ta daaj hẽ, ta hã hẽ tah'yy kasabé bã. Tah'yy kasabé bã, P'op Hagã Do ky n'aa etyy da, Dijab^b taky n'aa etyy do paa hadoo. ⁷Taw'ããts hẽ Jesus hã h'yy ka'eeh sa wahẽ n'aa pan'aa baad rabaher'oot sa ky n'aa, ta wób sa hã, Jesus hã h'yy kana'eeh do sa hã na-ããj né hẽ. Doooh hyb n'aa raky n'aa rejãã pé tii bã. Tii bã dooh Dijab haja bã sa hã.

Jesus hã h'yy ka'eeh do wahẽ n'aa sa masa n'aa sa ky n'aa hahỹỹh

⁸Ti hadoo Jesus hã h'yy ka'eeh do wahẽ n'aa masa n'aa sa hã. Taw'ããts hẽ ta wób weh'ëẽh do tii. Taw'ããts hẽ ky kaneh'ỹỹt doo. Taw'ããts hẽ dooh jarakẽ hedoo do heẽek do tado bã. Taw'ããts hẽ dooh tawad'ii bã dajẽer tagadoo hyb n'aa. ⁹Taw'ããts hẽ baad rababoo had'yyt hẽ, sa h'yyb tym ky n'aa natapaa hyb n'aa sa hã. Taw'ããts hẽ sa h'yyb gó rabennyw had'yyt hẽ baad hadoo do ky n'aa P'op Hagã Do metëeh doo, ẽr ky daheeh doo. ¹⁰Taw'ããts hẽ pooj jé ji metyy ta ti ajyy. Tii bã, baad ramoo boo bã, baad raboo bã, ji anoo Jesus hã h'yy ka'eeh do mahang ramasa hyb n'aa. ¹¹Ti hadoo na-ããj hẽ Jesus hã h'yy ka'eeh do sa wahẽ n'aa masa n'aa sa yỹm. Taw'ããts hẽ ta wób weh'ëẽh do tii. Taw'ããts hẽ dooh ta wób ranu mer'ood. Taw'ããts hẽ kaja hẽ denaa hẽ sa h'yyb ramahũũm, baad rababok hyb n'aa. Taw'ããts hẽ sahõnh hẽ ramoo bok do hã baad né hẽ ramoo bok.

¹²Taw'ããts hẽ sét ub ta yỹm, Jesus hã h'yy ka'eeh do wahẽ n'aa masa n'aa hã. Taw'ããts hẽ baad tah'yyb mahũũm ta taah, ta tób yt haj'eenh do na-ããj hẽ. ¹³Baad ub Jesus hã h'yy ka'eeh do wahẽ n'aa masa n'aa ramoo boo bã, ta wób raweh'ëẽh da, ta wób raky daheeh da sa hã. H'yyb neỹỹm doo me rahajaa tii bã raheer'ood bã nyy da Kristo Jesus hã ji h'yy ka'eeh doo.

Ta T'aah ky n'aa P'op Hagã Do metëeh do hahỹỹh

¹⁴Nayyw hẽ y karẽn a wẽ y bahõm. Ti hadoo né hẽ õm y ma erih hahỹỹh, ¹⁵y tahewad bã mabahapãh hyb n'aa y erih do hã, nyy da P'op Hagã Do karẽn ta karapee rababok. P'op Hagã

^b 3.6 Gereg kyy me ramaneëẽnh Nesaa Do Yb, Dijab. “Ji taky n'aa tapa had'yyt doo”, tahanãng pé ti Dijab.

Do hedëb had'yyt do karapee né tii, panyyg hanäm do ta wób hã metëeh doo, panyyg hanäm do mo n'aa jesuu doo. ¹⁶ Tak'ëp tabahetsooh né hë ta T'aah ky n'aa ër hã P'op Hagä Do metëeh doo:

“Aj'yy gó Kristo kas'ee wät.

Baad had'op do né hë Kristo P'op Hagä Do Sahee metëeh.

Ãäs rahapäh.

Ta ky n'aa rahe'ood hóm badäk hahÿ häj n'aa babuuj sa hã.

Badäk hahÿ haw'ãäts hë habong do wób rah'yy kae däk ta hã.

Hÿ pong jé ta wë tabasëek P'op Hagä Do an'oo bä.”

Ajyy j'ooj madäk doo me wedii do sa ky n'aa hahÿÿh

4 Baad ub P'op Hagä Do Sahee metëeh hahÿÿh: Hÿ jawén ta wób raberéd hóm da ër ky daheeh do Jesus ky n'aa. Raky daheeh da noo kanesa do sahee, Nesaa Do Yb karapee metëek doo. ² Ajyy j'ooj madäk doo me wedii do né hë metëek ta tii. Nes'aa däg sa h'yyb rawén hyb n'aa nap'eed wät taw'ãäts hë hadoo do hã. ³ Ramejũũ ji kanatëë. Ramejũũ ji nawa ji nawëh ta nawë wób. Dooh taw'ãäts hë tado bä ta ti rametëek doo. P'op Hagä Do pahuuj wät ta ti ji waa, ji tä, baad hadoo do ky n'aa hapäh do ky dah'eeh do ratsebé doo me ragadoo hyb n'aa. ⁴ Baad né hë sahõnh hë P'op Hagä Do pahuunh doo. Ti hyb n'aa dooh ji jesyk péh. Taw'ãäts hë sahõnh hë ër gadoo P'op Hagä Do hã ër h'yyb tsebé doo me ji waa, ji tä hyb n'aa. ⁵ Sahõnh hë baad däg ta ti ji waa, ji tä, P'op Hagä Do tii da taky hadoo do hyb n'aa, ji waa ji tä ji ky n'aa etsëe do hyb n'aa na-ãäj hë ta hã.

Nyy da Kristo Jesus karom baad hadoo do ji bahadoo do ky n'aa hahÿÿh

⁶ Ta ti ÿ mejũũ doo, Jesus hã h'yy ka'eeh do sa hã mama met'ëëg bä, Kristo Jesus karom baad hadoo do hado däk da õm. A h'yyb hejój n'aa Jesus ky n'aa ër ky daheeh doo. A h'yyb hejój n'aa baad hadoo do ky n'aa maky daheeh doo. ⁷ Mah'yyb ehód manä P'op Hagä Do nahapäh do sa panyyg hã, h'yy gatamah do sa panyyg hã. Mah'yyb ehód had'yyt hë P'op Hagä Do karën do hã, baad takah'ũũm hyb n'aa a h'yyb tym gó P'op Hagä Do karën doo. ⁸ Taw'ãäts hë ji hub ji metëek ji karajan hyb n'aa. Taw'ãäts hë ta bahãnh ji ma kametëek P'op Hagä Do karën do hã. Baad ub ti ji hã wawëe hë ji bawät nä bä, hÿ pong jé ji awäd bä na-ãäj hë.

⁹Te hub né hē ta tii. Taw'āāts hē sahōnh hē ky daheeh. ¹⁰Baad ub P'op Hagä Do karēn do er ma kametēek do hyb n'aa tak'ep er moo bok, tak'ep er ma metēek, baad er baher'oot ta ky n'aa. Dooh er h'yy gejë bā ta hā. P'op Hagä Do hedēb had'yyt do hā er h'yy kasadā. Sahōnh hē sa h'yyb tym dēeb tii. Jesus hā h'yy ka'eeh do ti ted'ēep. ¹¹Mama met'ēeg, mamejō na-āāj hē sa hā sahōnh hē om y ma erih doo.

¹²Man'oo om raty n'aa gesygy manā pahēew nā mabahadoo do hyb n'aa. Baad awäd, baad hadoo do maher'ood, baad ub ta wób makamahän, baad ub Jesus hā mah'yy kae, baad menytyw a h'yyb tym, a hā Jesus hā h'yy ka'eeh do rabahapäh hyb n'aa nyy da ji bad'oo, nyy da ji bawät. ¹³Y kanajaa nā bā, y karēn maner'ood had'yyt hē P'op Hagä Do kyy kerih do Jesus hā h'yy ka'eeh do sa hā. Maher'ood sa hā ta ky n'aa. Mama met'ēeg sa hā. ¹⁴Baad mahyb n'aa matakä P'op Hagä Do Sahee anoo do a hā mamoo wät hyb n'aa. A hā tabanoo tii, P'op Hagä Do ky n'aa rod a hā raheer'oot noo gó a hā tah'yyb däng do mamoo wät do pan'aa, Jesus hā h'yy ka'eeh do sa wahē n'aa a nuu gó sa moo radatoonh^c noo gó.

¹⁵Baad mamoo wäd ta ti om y mejüü doo. Ta hā had'yyt hē h'yyb däg. Tii bā da, Jesus karēn do hā a h'yyb kahüüm magyys hē tii b' sahōnh hē rabahapäh.

¹⁶Baad kanā a daaj hē. Baad manā ti mametēek doo, baad had'yyt hē mametēek hyb n'aa. Tii d' had'yyt hē madoo bā, P'op Hagä Do ed'ēep da om. Mametēek do ky dah'eeh do na-āāj hē ted'ēep da nesaa do mahänh.

5 Manabuuj gedo manā ajyy wehēh hedoo doo. Kaja hē denaa hē mamaher'ood sa hā. A yb hadoo man'oo bā sa hā. Ajyy wanehēh nā doo, hanäm gó er'ood sa hā. A h'yj ky n'aa hadoo man'oo bā. ²Yj wehēh hedo padēek doo, baad er'ood sa hā, a yjn hā maber'oot doo da. Yj wanehēh nā doo, baad er'ood sa hā. A ānh ky n'aa hadoo man'oo bā. Baad had'op doo da mabad'oo sa hā.

Patug tema bong do sa ky n'aa hahyjh

³Mamasaa yj patug tema bok do sa mab hē haj'eenh doo, wakān temah doo. ⁴Ynh patug tamah do ta taah nyy bā, ta tataah nyy bā, taw'āāts hē ti né hē mas'aa ta hā. Taw'āāts hē ti né hē mas'aa sa wakān, tii da P'op Hagä Do karēn do hyb

^c 4.14 Tsimoot P'op Hagä Do asēew hōm do heen n'aa tii.

n'aa ji hã. Taw'ãäts hẽ sa yb, sa ỹñ, sa oow, sa hoonh ramasa. Raned'ëed is noo gó ramasa do paa ramebaanh do tii. P'op Hagä Do gen'aak tii d' ji adoo bä. ⁵Ỹñh patug tamah do wakãan tamah doo, kamanasa doo, P'op Hagä Do hã tadaab yyp. P'op Hagä Do hã taky n'aa etsëe adëb bä, atsëm na-ãäj hẽ tamasa hyb n'aa ta hã. ⁶Ỹñh patug tamah do ajyy hã had'yyt h'yyb däk doo, edëb né paawä, dajëp do hadoo ta h'yyb tym P'op Hagä Do matym gó. ⁷Mamaher'ood patug temah doo, raky daheeh hyb n'aa ỹ mejüü doo, ta wób raky n'aa natapaa hyb n'aa sa hã. ⁸Jé wakãan näng péh, tamanasa do ta wakãan, ta yb, ta ỹñ nahag'ãäs doo, teréd hõm Jesus ky n'aa ër h'yy kaha'eeh doo. Jesus hã h'yy kana'eeh do bahãnh däg sa h'yyb nesaa do hã.

⁹Ji erih ỹñh patug tamah do häd ji masa do pan'aa sa häd kerih do heen n'aa hã, ⁶⁰ ta baab bahãnh tabahado däk bä, ta patug makü wanadii do paah, ¹⁰taky n'aa etsä bä baad hadoo do tamoo wät do hã, baad ub ta taah tawä bä, baad ta wób tagado bä ta tób bä, Jesus hã h'yy ka'eeh do tamasa bä, tat'yyd mehïin bä kas' uut doo, baad hadoo doo me ta wób tamasa bä. Tii d' tado bä ji erih ta häd ji masa do pan'aa heen n'aa hã.

¹¹Taw'ãäts hẽ dooh ji erii bä patug tema bong do wanehëh nä do sa häd ji masa do pan'aa heen n'aa hã. Aj'yy hã rah'yy kejäg bä sa häd ji erii däk do jawén paa bä paawä, reréd hõm da Kristo ma had'yyt ramoo bok do paah, raketëe hyb n'aa p'aa hënh. ¹²Ti tahado bä sa daaj hẽ raky n'aa katakyyk baad nadoo doo me, pooj jé Kristo hã raky kajäk do raky keh'ỹyt do hyb n'aa. ¹³Moo nehøj padäg da patug temah do wób rawanehëh nä bä ji masaa bä. Boo kahah'üünh da ta wób sa tób hënh. Ta wób da ranu mer'oot, ta wób da raheer'oot. Ta wób kyy hã da ranu toonh. Raheer'oot da ji naher'oot doo. ¹⁴Ti hyb n'aa hã ỹñ pé taw'ãäts hẽ patug tema bong doo, wanehëh nä doo, p'aa hënh raketëe. Na metaah. Taw'ãäts hẽ baad rabahag'ãäs sa tób yt haj'eenh doo. Taw'ãäts baad had'yyt hẽ rababok, dooh ër majïi ky n'aa rejãã pé do hyb n'aa ëer. ¹⁵Ta ti ỹ wén her'oot, ỹyj patug tema bong do wób raberéd hõm do hyb n'aa Jesus hã rah'yy ka'eeh do paah. Nesaa Do Yb raky dahé däk.

¹⁶Ỹñh Jesus hã h'yy ka'eeh doo, patug tamah do tanyy bä ta wakãan mahang, taw'ãäts hẽ ti tahag'ãäs, tamasa. Dooh taw'ãäts hẽ tado bä tadaab yb bä Jesus hã h'yy ka'eeh do wób sa wë. Jesus hã h'yy ka'eeh do wób ramasa ỹyj patug tema bong doo, wakãan temah doo. Ta wakãan nyy bä, ti né hẽ hag'ãäs.

Jesus hã h'yy ka'eeh do sa wahë n'aa ky n'aa hahÿÿh

17-18 Hahÿÿ da P'op Hagã Do baher'oot ta kyy kerih doo gó: “Taw'ãäts hë ji anoo tiriig uuh tabawa booj yb hã, tiriig tahes'ooj hõm do ta moo me. Dooh ji noo maw'yuyd däg bã tanawa hyb n'aa”,^d nãng mã P'op Hagã Do kyyh. “Taw'ãäts hë moo bok do sa hã ramoo bok do sãm ji banoo”,^e nãng mã na-ãäj hë ta kyy kerih do hã. Ti hyb n'aa na-ãäj ji weh'ëeh, baad ji banoo Jesus hã h'yy ka'eeh do sa wahë n'aa baad moo bok do sãm, jé tak'ëp Jesus ky n'aa her'oot doo, Jesus hã h'yy ka'eeh do ma met'ëek doo.

19 Mamaa newë manã Jesus hã h'yy ka'eeh do sa wahë n'aa see raky n'aa tapa bã. Pawóp hë, tamawoob hë tado bã ti ky n'aa tapaa doo, ti mahyb n'aa matakã sa kyyh. 20 Nesaa do Jesus hã h'yy ka'eeh do sa wahë n'aa see moo wäd bã, ji nabuuj gedoo sahõnh hë sa matym gó, ta wób rajeÿÿm hyb n'aa, nesaa do ramoo nabok hyb n'aa. 21 P'op Hagã Doo, Kristo Jesus, ãas P'op Hagã Do pa hab'ëeh do na-ãäj sa matym gó òm ÿ mejüü baad maky daheeh hyb n'aa sahõnh hë a hã ÿ mejüü doo. Taw'ãäts hë baad ub a h'yyb sahõnh hë sa hã. Séd demuun maher'ood, séd demuun magado sahõnh hë a najiis rado bã, a najiis ranado bã na-ãäj hë.

22 Mahyb n'aa jóh manã a moo madatoonh do ta see nuu gó, Jesus hã h'yy ka'eeh do wahë n'aa tabahadoo hyb n'aa. Mahyb n'aa jóh bã, nepäh òm ta h'yyb hata hado däk nesaa do tamoo wät do paa hã. Taw'ãäts hë baad makan'yuh, baad had'yyt hë mabawät hyb n'aa. 23 Meëg had'yyt manã naëng. A nahëe hyb n'aa taw'ãäts hë mahäd eëek na-ãäj uwa bëeh hejooonh doo, mah'yy gamahÿÿnh do hyb n'aa, mah'yy gamahÿÿnh do badoo wät hyb n'aa.

24 Wyt ta maab hë nesaa do ta wób moo bok doo. Ji metyy do pooj jé, baad raboo bã ji bahapäh hyb n'aa, wyt ta maab hë nesaa do ramoo bok doo. Kejën nã nesaa do ta wób moo bok doo. Ta jawén kã ji bahapäh. 25 Ti hadoo né hë baad hadoo do hã. Wyt ta maab hë baad hadoo do ta wób ramoo bok doo. Ta wób baad hadoo do sa mo haj'aa, ta jawén ji bahapäh.^f

^d 5.17-18 Dew-Teronom 25.4

^e 5.17-18 Rukas 10.7

^f 5.25 Nayyw hë ji nahapäh do hyb n'aa ta see pé noo gó ta wób sa h'yyb, dooh Paw-Ro karën bã Tsimoot hyb n'aa jóh bã Jesus hã h'yy ka'eeh do wahë n'aa pan'aa tabasëm bã.

Karom kanep'aak do Jesus hã h'yy ka'eeh do ky n'aa hahÿÿh

6 Taw'ãäts hẽ sa karom kanep'aak do baad sa kariw n'aa rawehẽẽ had'yyt hẽ, P'op Hagã Do ta wób raky n'aa narejãã hyb n'aa, ẽr metẽẽk do raky n'aa narejãã hyb n'aa na-ããj hẽ.

²Dooch taw'ãäts hẽ tado bã sa kariw n'aa raty n'aa gesyyg bã sэд demuun Jesus hã rah'yy ka'eeh do hyb n'aa. Taw'ãäts hẽ ta bahãnh ramoo bok sa kariw n'aa wẽ, sa wakããn rabahadoo do hyb n'aa, Jesus hã rah'yy ka'eeh do hyb n'aa, sa hã rakamahãn do hyb n'aa na-ããj né hẽ.

Mama met'ẽẽg ta ti a hã ÿ metẽẽk doo. Mamaher'ood sahõnh hẽ sa hã raky daheeh hyb n'aa.

Taw'ãäts hẽ ji h'yy gadajang ji wẽ hanãng do hã ky n'aa hahÿÿh

³Jé te hub nadoo do ma metẽẽk péh, Jesus Kristo ẽr Wahẽ N'aa ky n'aa ky nadaheeh péh, P'op Hagã Do ky n'aa ẽr mahetẽk do ky nadaheeh péh, ⁴ta daaj hẽ ta hã hẽ tah'yy kasab'ee tii. Dooch tahapãh pé ta tii. Tak'ẽp ta ti hedoo do ragen'aak kyy p'ãã raky kedag bã. Nahẽẽ hado dãk ta ti sa hã. Ta ti han'aa hyb n'aa jewes doo, kep'uuk doo, ky n'aa rejãã doo, daap tah'yy ganãng do ta wób hã. ⁵Ta ti hedoo do raky kedag had'yyt hẽ. H'yy gatema bok. Ta see hado dãk sa h'yyb. Dooch sa h'yyb tym gó baad hadoo do awãd wãd bã. P'op Hagã Do hã rawén h'yyb dãk, dajẽẽr hyb n'aa red'oo.

⁶P'op Hagã Do karẽn doo da ji aboo bã, tak'ẽp baad hadoo do tanoo né ji hã, ji h'yy gadajaa bã ji wẽ hanãng do hã, dooch ji hyb n'aa hũũm bã ti bahãnh. ⁷Dooch ji manaa pé ji henãng noo gó. Dooch né hẽ ji mahũũm pé ji dajẽp noo gó. ⁸Ti hyb n'aa, taw'ãäts hẽ baad ji tsebé ji waa nyy bã, ji saroor enã bã. ⁹Ta wób, tak'ẽp ma nãng do karẽn do raky daheeh da Nesaa Do Yb sa hã h'yyb tatuk doo. Kadẽẽ bẽẽh hadoo da sa h'yyb tym h'yy gatamah doo gó rakarẽn do hã. Rah'yy karẽn do nes'aa d' sa hã, kasuud bong da, dooch d' rahyb n'aa jawyg wãd bã sa hã, sa daaj hẽ rakawatsik da. ¹⁰Dajẽẽr ji kamahãn doo, hajõng nesaa do du n'aa do tii. Ta wób, dajẽẽr rakamahãn do hyb n'aa, reréd hõm Jesus hã rah'yy ka'eeh doo, sa daaj hẽ rabahoop rakarehejãã doo, tak'ẽp dajẽẽr rakarẽn do hyb n'aa.

Taw'ãäts hẽ P'op Hagã Do karẽn do hã ji h'yyb dãk do ky n'aa hahÿÿh

¹¹Õm Tsimoot, P'op Hagã Do sii hawãt doo, tii d' madoo manãh. Baad hadoo do hã h'yyb dãg. P'op Hagã Do karẽn do hã mah'yyb dãg. P'op Hagã Do hã h'yy kae had'yyt hẽ. Ta wób makamahãn had'yyt hẽ.

H'yy gajëë hõm manä P'op Hagä Do karën doo da mabawät do hä. Kaja hë denaa hë had'yyt hë er'ood ta wób sa hä. ¹²Jé tsyym kas'ÿÿ doo, tak'ëp né hë rawaj'aah raj'aa ketsë do sãm ragadoo hyb n'aa. Ti hadoo ÿ karën tak'ëp mah'yyb däg Kristo karapee heh'äät do mabahadoo hyb n'aa, edëb had'yyt do magadoo hyb n'aa, hÿ pong jé Jesus sii had'yyt hë mabawät hyb n'aa kä. Ta ti hyb n'aa òm P'op Hagä Do bats'yyt paa hajõk do ramaa newëë bä, baad ub mabaheer'oot noo gó Jesus hä mah'yy ka'eeh doo.

¹³P'op Hagä Doo, sahõnh hë badäk hahÿÿ hä hanäng do tabed'ëep. Kristo Jesus ky kaneh'ÿÿt baad hadoo do hä Pon-Sijo Pirato sii taber'oot noo gó. Ti hyb n'aa kä, P'op Hagä Doo, Kristo Jesus daheeh sa matym gó òm ÿ mejüü hahÿÿh: ¹⁴Baad mamoo wäd òm ÿ mejüü do hä, òm raky n'aa natapaa hyb n'aa mamoo wät do hä Jesus Kristo ër Wahë N'aa matëeh bä kä. ¹⁵Jesus Kristo matëeh da P'op Hagä Do an'oo bä, tah'yyb däng noo gó. Ti né hë P'op Hagä Doo, sahõnh hë weh'ëeh doo. Jããm né hë ti sahõnh hë bag'ääs doo. Sahõnh hë badäk hahÿ wahë n'aa sa wahë n'aa. Hyb n'aa jewyk do sa wahë n'aa. ¹⁶Sét né hë ti nadajëp doo. Ta bag tak'ëp gabarëeh do mahang tabawät. Ti hyb n'aa dooh ji haja bä p'eets hë ta hä ji kaja bä. Dooh hapäh péh, tabad'op hë da ji ty gepëeh. Taw'ääts hë sahõnh hë raweh'ëeh tii. Taw'ääts hë né hë tak'ëp tahaj'ap doo me tabagãã had'yyt hë. ÿÿ. Tii d' né hë. Taw'ääts hë.

¹⁷Mamejõ badäk hahÿÿ bä tak'ëp wekãp do sa hä, rah'yy kanasab'ee hyb n'aa. Maher'ood sa hä rah'yy kanasadä hyb n'aa sa ma hä. Nayyw hë tagawatsik tii. Ti hyb n'aa dooh ta hä ji h'yy kasadëë bä. Taw'ääts hë P'op Hagä Do hä rah'yy kasadä. Ti né hë tak'ëp hanoo do ji hä sahõnh hë ji karën do ji h'yyb tsebë n'aa. ¹⁸Mamejõ wekãp do sa hä, baad hadoo doo, masa doo, sa wë hanäng doo me ramoo bong hyb n'aa. Taw'ääts hë hajõng do sa mo haj'aa taw'ääts hë hadoo doo. Taw'ääts hë wë bedoh do ramasa. ¹⁹Tii d' radoo bä da, ti anäng da ta sãm heh'äät do nahãnh do ragadoo do pan'aa hÿ pong jé P'op Hagä Do wë. Edëb had'yyt do ragadoo tii bä.

²⁰Tsimoot, baad manä a hä P'op Hagä Do anoo doo. Baad kanä P'op Hagä Do panyyg nadoo do daap kaher'oot do mahãnh. Maky gado manä karën do a hä ky kedak doo, “h'yy ganäng do ky n'aa” daap ramaneëënh do hä. ²¹Ta wób raky dahé däk ta ti ky n'aa, ti raberéd hõm Jesus hä rah'yy ka'eeh do paah.

ÿ karën P'op Hagä Do ky enyym bë hä. Jããm hë kä.